

**Kalaallit Nunaannut aammalu Kalaallit Nunaanniit timmisartuussinerni imermik Kalaallit Nunaanni imeqarneqartumik sassaalliteqartoqartalernissaa sulissutigineqassasoq, ilanngullugu attuumassuteqartunik suleqateqarnikkut soorlu timmisartuutileqatigiiffiit aammalu Visit Greenland Naalakkersuisut peqquneqarnissaannik Inatsisartut aalajangiiffigisassaattut siunnersuut**  
(Inatsisartunut ilaasortaq Lars Poulsen, Siumut)

### **Akissuteqaat**

(Nunanut allanut, Inuussutissarsiornermut, Aatsitassanullu Naalakkersuisoq)

### **Aappassaaneerineq**

Inuussutissarsiornermut Aatsitassanullu Ataatsimiititaliap isumaliutissiissutaanut, ataatsimiititaliallu isumaqatigiittut allannguutissatut siunnersuutaanut Naalakkersuisut sinnerlugit qutsavigaara.

Siunnersuutip siullermeerneqarnerani Naalakkersuisut paasivaat, Kalaallit Nunaanni erngup atorluarneqarnissaanut periaatsimik nassaartoqarnissaata pingaaruteqarnera partiit akornanni siammasissumik isumaqatigineqartoq. Taassuma saniatigut imermik Kalaallit Nunaanneersumit tikeraanut tunisisarnikkut, Kalaallit Nunaata nittarsaanneqarnissaanut periarfissaq pitsaasutut isigineqarpoq.

Inatsisartut aalajangiinerat inuussutissarsiutilinnut iluaqutaanissaanik, Kalaallit Nunaannullu aamma Kalaallit Nunaanniit timmisartuussinerni tunisassianik nunatsinneersunik, matumani pingaartumik imermik nunatsinni maqinneqartumik, sassaalliteqartoqartalernissaa sulissutigineqarnissaa pillugu ataatsimiititaliap inassuteqaataanut Naalakkersuisut isumaqataapput.

Ataatsimiititaliap allannguutissatut siunnersuutaa Naalakkersuisut inassutigaa.